

Agama itu Nasihat

Al-Qur'an sesuai bagi segala zaman

(oleh: al-Ustādh Mustajab bin Shi'in)



SERUAN ISLAM



“.... al-Qur'an adalah sesuai bagi segala bangsa, segala masa dan segala tempat, dan dipeliharakan Allah . . . hingga hari kiamat”. Demikian kata ustaz Mustajab dari “PERGAS” (Persatuan Guru-guru Agama Singapura), dalam syarahannya di Radio Singapura baharu-baharu ini.

Seyoga disebut, Persatuan Guru-guru Agama Singapura mengadakan tabligh (syarahan agama) pada tiap-tiap sebulan sekali – dalam ruangan agama radio Singapura.

“Agama itu nasihat” demikian kesimpulan sebuah hadis suci yang telah dikupas oleh beliau seperti berikut:

Imam Muslim, *rahimahu Allah*, telah meriwayatkan sebuah hadis, yang nilainya sama dengan seperempat agama – menurut pendapat sebahagian ulama. Hadis ini demikian bunyinya.

Qāla Rasulullah ṣallāllahu 'alayhi wa sallam: al-dīn al-naṣīḥah. Qulnā liman? Lillāh wa li kitābihī wa li rasūlihī li aimmah al-muslimīn wa 'ammātihim¹.

Ertinya: Sabda Nabi Muhammad *ṣallā Allāh 'alayhi wa sallam*: “Agama adalah nasihat”. Sahabat Rasulullah bertanya: “Bagi siapakah?” Rasullullah menjawab: “Bagi Allah, bagi kitab-Nya, bagi Rasul-Nya, bagi ketua-ketua orang Islam dan orang-orang Islam seluruhnya.”

Yang dimaksudkan agama ialah agama Islam, rukun-rukun Islam, pokok dan dasar Islam.

Nasihat erti: Membersihkan pendapat-pendapat

fikiran-fikiran kita dari tipu daya dan dusta bagi faedah yang diberi nasihat dan mengutamakan maslahatnya; atau memberi pendapat-pendapat atau fikiran-fikiran yang membina, yang bersih dari tipu dan daya dusta. Maka nasihat ini dinamakan “agama” dan juga “keislaman”.

Bagi siapakah nasihat itu?

Jawabnya: 1. Bagi Allah, 2. Bagi Kitab Allah, 3. Bagi

Rasulullah, 4. bagi ketua-ketua orang-orang Islam dan 5. Bagi orang-orang Islam seluruhnya.

Nasihat kerana Allah

Erti nasihat kerana Allah:

Iaitu beriman kepada Allah Ta‘ālā sepenuh-penuh keimanan, jangan sekali-kali menyekutukan Dia walau syirik yang terlalu kecil sekalipun, seperti takbur, buang ancak, bersemah,

¹ pembetulan pada hadis ditambah *li rasūlihī*

bertilik, memuja-muja selain Allah, dan sebagainya. Maka kelakuan-kelakuan yang seperti inilah sangat bertentangan dengan sifat-sifat kebesaran Allah Ta‘ālā, keadilan dan kekuasaan Allah Ta‘ālā, dan bertentangan dengan erti iman yang sebenarnya. Kelakuan seperti ini masih lagi dilakukan oleh setengah-setengah orang kita ini adalah menunjukkan kejahanan

Berbalik kita kepada erti nasihat kerana Allah.

Hendaklah kita percaya bahawa Allah Ta‘ālā bersifat dengan segala kesempurnaan dan Maha Suci daripada segala kekurangan.

Hendaklah kita menjalankan perintah Allah Ta‘ālā dan menjauhi larangannya.

Kasih dan sayang kerana Allah, benci dan marah kerana Allah, jangan kerana wang dan pangkat.

Menyokong orang-orang yang taatkan Allah dan menentang orang-orang yang derhaka kepada Allah ‘Azza wa Jalla.

Sentiasa gemar kepada yang disukai Allah, dan benci kepada yang dimurkai Allah.

Mengakui dan menyedari akan kurnia-kurnia Allah dan bersyukur kerana nikmat-nikmat Allah Ta‘ālā yang tidak terhitung itu.

Hendaklah kita menyeru orang ramai berbuat demikian tadi dan mengajar mereka sifat ikhlas dan berbuat bersih semata-mata kerana Allah Ta‘ālā.

Tentang ini Allah Ta‘ālā berfirman:

*Wa mā umirū illā li ya‘budū Allāha mukhlisīna la hu al-dīnā
Iunafā’ā wa yuqīmū al-salātā wa yu‘tū al-zakātā wa dhalikā dīnū al-qayyimah.*

Ertinya: “Tidak ada apa yang mereka diperintahkan melainkan semata-mata menyembah kepada Allah dengan sebersih-bersihnya (dengan ikhlas), gemar dan cenderung kepada agamanya, mendirikan sembahyang dan mengeluarkan zakat. Dan itu adalah agama yang betul.”

Nasihat kerana kitab Allah

2. Ertinya nasihat kerana Allah:

Kitab Allah ialah al-Qur'an dan juga kitab-kitab suci Allah Ta‘ālā.

Nasihatnya iaitu beriman bahawa al-Qur'an adalah turunnya daripada Allāh Ta‘ālā, bukan rekaan makhluk.

Perbezaan al-Qur'an dari yang lain ialah tiada sesuatu pun yang boleh menandingi atau menyamai al-Qur'an, dan tiada siapa pun yang terdaya membawa sepotong “surah” seperti al-Qur'an.

Membaca al-Qur'an hendaklah dengan sebaik-baiknya, dengan betul serta khusyuk dan merendah diri. Jangan pula membacanya lintang-pukang tak tentu arah panjang pendeknya, makhraj dan waqafnya.

Firman Allāh Ta‘ālā: *Wa rattili al-Qur'anā tartilā.*

Ertinya: Dan bacalah – Ya Muhammad – akan al-Qur'an itu dengan tartil dan teratur.

Hendaklah kita membacanya ikut bacaan qiraat-qiraat sahih oleh ahli-ahli Qur'an yang masyhur.

Menghormati al-Qur'an menanggung dan menyentuh al-Qur'an hal keadaan kita bersuci.

Sudah terbit!

Pengajian

KISAH PELAYARAN ABDULLAH MUNSHI

di-susun sa-mula oleh:

E D R U S

Harga \$2.50 sa-naskhah
tambah belanja pos (register) 40 sen

diterbitkan oleh

Q A L A M

Menyimpannya di tempat yang suci, mulia lagi bersih.

Jangan diperukkan di mana-mana sahaja.

Mempercayai segala kandungannya, iaitu tidak ada yang

dusta atau karut.

Membela jangan sampai ada orang pandang rendah kepada

al-Qur'an, seperti katanya al-Qur'an tidak sesuai lagi

dengan zaman sekarang. Sesungguhnya al-Qur'an adalah sesuai

bagi segala bangsa, masa dan segala tempat, dan

dipeliharakan Allah daripada diubah-ubah oleh orang sehingga

hari kiamat. Hal ini telah ditegaskan oleh Allah Ta'ālā,

firmannya:

Innā nahnu nazzalnā al-dhikra wa innā lahu lahāfiżūn.

Ertinya: "Sesungguhnya Kamilah yang menurunkan al-Qur'an

dan sesungguhnya kami tetap menjadi pemeliharanya".

Hendaklah kita mempertahankan al-Qur'an, jangan sampai

diputar belitkan oleh orang-orang yang cuba hendak mempermain-mainkan

al-Qur'an. Jangan pula kita melampaui batas hukum-hukum

al-Qur'an. Jangan pula al-Qur'an memberi hukum kita langgar atau

kita meninggalkannya dan menggunakan hukum yang lain.

Hendaklah mempelajari hukum-hukum al-Qur'an melalui ilmu

tafsir. Jangan pula memandai-mandai, belajar sendiri, mengikut

hawa nafsu kita.

Menggunakan hikmah-hikmah dan nasihat-nasihat al-Qur'an.

Memikirkan segala ajaib-ajaib al-Qur'an. Jangan pula kita

membaca suatu ayat yang diminta kita berfikir, alih-alih membutakan

mata atau buat tak tahu. Tetapi kalau kita tidak

tahu belajarlah hendaknya, supaya kita terlepas daripada

dosa selagi kita belajar.

Hendaklah kita mengajak orang menjalankan nasihat-nasihat

al-Qur'an, menggalakkan mereka supaya berebut-rebut kepadanya, mulai



Sebahagian dari kaum ibu yang telah hadir di rumah *Jamiyah al-Da'wah al-Islamiyyah, Singapura*, kerana mendengar

syarahan dan bacaan Qur'an dari qari bangsa Afrika yang terkenal, Shaykh Yahya Ḥussayn Jumu'ah

dari membaca al-Qur'an dengan mendapat sepuluh kebaikan bagi tiap-tiap satu huruf, hingga kepada mengetahui, mengajar dan mengamalkan isi kandungan dan menjadikan dia pegangan orang di dunia ini.

Nasihat kerana Rasullullah

3. Ertinya nasihat kerana Rasulullah:

Nasihat kerana Rasulullah *ṣallā Allāh ‘alayhi wa sallam* ialah mempercayai bahawa Nabi Muhammad ‘alayhi al-ṣalātu wa al-sallām ialah seorang Rasul dan utusan dari Allah ‘Azzā wa Jalla kepada sekalian manusia, Nabi akhir zaman, serta mempunyai segala apa yang dibawanya.

Mentaati segala perintahnya.

Menyokong agamanya, menyokong pendokong-pendokong agamanya dan menentang

akan penentang-penentang agamanya.

Membesarkan hak-hak dan kemuliaan Rasul, menghidupkan sunah Rasul, *ṣallā Allāh ‘alayhi wa sallam*.

Mempelajari pengajarannya, hadis-hadisnya.

Menyelidiki gemala hikmahnya, dan mengikut jejak langkahnya, sebagaimana yang diperintahkan oleh Allah Ta‘ālā dengan firmanya:

Wa lakum fī rasūli Allāhi uswatuṇ ḥasanah.

Hendaklah kita tahu menggunakan hadis mengikut ilmu *uṣūl al-hadīth*, jangan ambil sahaja dengan tidak memandang kepada ulama usul.

Hendaklah kita berlemah lembut pada mengajar pengajaran-pengajarannya.

Menanamkan semangat menghormatinya dan mengamalkan² pengajaran, dan menanamkan semangat cinta kepadanya.

Mengajak orang-orang mengamalkan pengajarannya, berkelakuan dengan kelakuannya, mengasihi kaum kerabatnya, dan sahabatnya.

Menjauhi orang ahli bid'ah, menjauhi orang-orang yang menyentuh peribadinya dan peribadi sahabat-sahabatnya.

Hendaklah menyeru orang mengerjakan nasihat-nasihatnya dengan terang dan sulit, zahir dan batin.

Nasihat bagi ketua-ketua orang Islam

4. Nasihat bagi ketua-ketua orang Islam:

Mereka itu ialah khalifah-khalifah Rasul, wakil-wakil khalifah dan alim ulama.

Adapun nasihat kerana mereka ialah: turut perintah mereka semuanya dalam perkara yang sesuai dengan hak dan kebenaran, seperti bersembahyang di belakang mereka, berjuang bersama-sama mereka, menyerahkan zakat mereka jika diminta atau jika mereka adil, jangan keluar menentang mereka meskipun mereka berlaku zalim: ini ialah ijma‘ atau sepakat kata ulama. Yang harus kita keluar menentang mereka itu jika mereka terlalu zalim melampau dan mereka orang yang merampas tumpuk pemerintahan, bukan yang dilantik.

Hendaklah kita mendoakan mereka mendapat kebaikan, bukan sebaliknya.

Hendaklah membantu mereka, jangan mendiamkan diri, mengingatkan mereka kepada Allah, perintah-perintah Allah, kerana Allah Ta‘ālā sahajalah yang berkuasa atas segala-galanya. Kerana Dialah yang menegakkan pemerintahan dan Dialah yang melucutkan pemerintahan. Dialah yang memberi mudarat dan Dialah yang memberi manfaat.

Hendaklah kita memberi ingat kepada mereka akan barang yang mereka lalai dan lupa dari hak-hak orang Islam.

Hendaklah mengambil hati rakyat supaya taat kepada mereka.

Hendaklah berbaik-baik sangka kepada mereka, jangan berjahat sangka. Hendaklah kita menghormati mereka, kalau tidak kita siapa lagi? Jangan pula kita sia-siakan mereka. Hendaklah kita menunaikan tugas-tugas kita terhadap mereka.

Demikian juga hendaklah kita menghormati alim ulama dan menerima fatwa-fatwa mereka. Jangan pula kita menolak fatwa-fatwa itu. Patutlah kita ketahui bahawa pendapat kita adalah mengikut fikiran yang kerap kali tak betul, sedang

² Dalam teks Jawi dieja sebagai menganamakan.

fatwa alim ulama adalah berdasarkan agama yang terjamin dan menggantungkan harapan mereka kepada taufik dan hidayah Allah *Ta’ālā*.

Nasihat bagi masyarakat umumnya

5. Nasihat bagi masyarakat umumnya.

Ertinya hendaklah kita sama-sama memberi petunjuk kepada masyarakat Islam: Orang-orang ramai, orang-orang kampung, orang-orang jiran, saudara mara kita dalam urusan dunia dan akhirat. Jangan pula kita diamkan diri, jangan masing-masing nafsu nafsi. Jangan pula nanti ada di antara kita yang tak suka ditegur orang, lalu melemparkan kata-kata tak manis.

Hendaklah kita menjaga kehormatan orang, jangan menyentuh maruah orang, jangan menjatuhkan air muka orang walau dalam perkara kecil sekalipun.

Hendaklah menolong dan membala sekadar yang terdaya. Hendaklah menyuruh berbuat baik dan menegah berbuat jahat.

Hendaklah mengambil berat mengenai urusan orang-orang Islam dengan kata-kata, fikiran, tenaga dan juga harta.

Nabi *sallā Allāhu ‘alayhi wasallam* bersabda:

Man lam yahtimmu bi amri al-muslimīna fa laisa minhum

Ertinya: “Barang siapa tidak mengambil berat akan urusan-urusan orang-orang Islam bukanlah dia daripada golongan orang-orang Islam yang sempurna.”

Hendaklah kita menghormati orang-orang tua kita, dan mengasihi orang-orang muda kita dan kanak-kanak kita. Sekarang sudah banyak orang-orang muda tidak menghormati orang-orang tua, anak melawan bapa, adik melawan abang, murid melawan guru. Dan sudah banyak pula bapa menghalau anak, abang bersikap keras terhadap adik, guru bersikap kasar terhadap murid.

Kepada yang muda, yang tua perlulah bersikap pengasih, penyayang, sentiasa awas terhadap gerak-geri yang muda. Hendaklah perasaan saling mengerti dan kasih sayang antara kedua belah pihak. Masing-masing mengasihi diri yang lain sebagaimana mereka mengasihi diri sendiri.

Tentang cara nasihat menasihati itu pandai-pandailah kita. Kalau perlu dengan tangan tangankanlah (maksudnya, gunakanlah kuasa dan pengaruh, kalau ada, untuk menjayakannya - Pengarang Qalam), kalau perlu dengan mulut, maka dengan mulutlah, atau dengan hati maka hatikanlah (maksudnya: kalau kita tidak ada kuasa dan pengaruh, dan tidak dapat menegur dengan mulut, maka doakanlah sahaja di dalam hati mudah-mudahan ia mendapat petunjuk – Pengarang Qalam), atau dengan kelakuan maka lakukanlah sampai menjadi contoh teladan yang baik. Hendaklah kita bertentu-tentuan, berpesanan dan berwasiat amanah serta berbanyak sabar.

Itulah dia hadis yang nilainya seperempat agama. Tetapi jika diperhatikan baik-baik akan hadis ini, maka kita akan dapat mengakui bahawa nilainya sama sahaja dengan empat perempat agama Islam. Dengan al-Qur'an sahaja kita dapat menjelaskan bahawa al-Qur'an melengkapi segala-galanya. Hanya sanya kita sahajalah yang membuktikan dapatkah kita menggunakan al-Qur'an itu sebagaimana yang dikehendaki?

Kitab sejarah untuk sekolah-sekolah

Sudah siap

Sejarah Ringkas

Muhammad

sallā Allāh ‘alayhi wa sallam

Disusun oleh Edrus. Sejarah

ringkas junjungan kita Muhammad (S.A.W) yang perlu diketahui terutamanya oleh murid-murid sekolah.

Tiap-tiap bahagian disudahi dengan pertanyaan-pertanyaan yang boleh mengingatkan murid-murid kepada apa yang telah dibacanya. Bahasanya mudah difaham dan disulam dengan peta dan gambar-gambar yang berkenaan dengan sejarah-sejarah itu. Pertama buku sejarah ringkas yang diterbitkan oleh Qalam untuk sekolah-sekolah.

Senaskhah \$1.20

post 10 sen